



KENYATAAN/SIARAN AKHBAR

BENGKEL PERDANA WAWASAN MASYARAKAT PUTRAJAYA

Putrajaya - Perbadanan Putrajaya (PPj) telah menapak selangkah lagi dalam pelaksanaan Local Agenda (LA) 21 Putrajaya dengan penganjuran Bengkel Perdana Wawasan Masyarakat Putrajaya yang berlangsung selama dua hari di Pusat Marifim Putrajaya, Presint 5, Putrajaya.

Tan Sri Samsudin Osman, Presiden PPj ketika berucap di majlis perasmian bengkel tersebut berkata, "Pelaksanaan Bengkel Wawasan Masyarakat LA 21 Putrajaya adalah untuk menggalakkan semua wakil komuniti, agensi awam dan swasta yang berkepentingan di Putrajaya, wakil-wakil NGO serta lain-lain *stakeholders* berbincang secara terbuka mengenai isu-isu dan potensi perancangan dan pembangunan yang boleh dilaksanakan secara bersama dengan masyarakat Putrajaya ke arah menjadikan Putrajaya sebuah bandar yang mampan".

LA 21 Putrajaya merupakan program yang dilancarkan oleh PPj pada penghujung tahun 2008 bertujuan membentuk perkongsian antara pihak berkuasa tempatan (PBT) dengan masyarakat setempat dan sektor swasta serta lain-lain agensi kerajaan bagi mencapai kata sepakat dalam merancang pembangunan yang mampan di mana integrasi keperluan pembangunan fizikal, sosial, ekonomi dan pemeliharaan alam sekitar akan dititikberatkan.

Mengikut garis panduan pelaksanaan LA 21 yang disediakan oleh Kementerian Perumahan dan Kerajaan Tempatan, Bengkel Wawasan adalah salah satu daripada proses pra-syarat dalam pelaksanaan LA 21 di sesuatu PBT. Resolusi Wawasan Masyarakat Putrajaya yang akan dibentuk pada Bengkel ini akan mengambilkira semua aspirasi komuniti dan *stakeholders* di Putrajaya. Wawasan ini akan menjadi panduan di dalam pelaksanaan program dan aktiviti LA 21 Putrajaya.

Selaras dengan penekanan pihak kerajaan terhadap pemeliharaan alam sekitar dan penggunaan teknologi hijau, PPj juga akan menitikberatkan polisi pembangunan yang menekankan kepentingan menjaga alam sekitar dan mengambil langkah selaras dengan polisi untuk menjadikan Putrajaya sebagai salah satu daripada perintis Bandar Hijau (*Green Township*).

Justeru, program LA 21 Putrajaya yang akan dijayakan bersama rakan kongsi yang terdiri daripada wakil komuniti dan *stakeholders* Putrajaya, akan menjurus kepada program-program untuk mempromosikan Dasar Teknologi Hijau, Kempen Kitar Semula Komuniti dan sebagainya. Selain itu, program-program LA 21 juga akan berusaha mewujudkan komuniti mampan, menggalakkan lagi aktiviti ekonomi yang lebih *vibrant*, menitikberatkan program Bandar Selamat dan Sejahtera dan juga mempromosikan produk-produk pelancongan Putrajaya.

Kesemua usaha dan inisiatif yang diambil menerusi program-program LA 21 Putrajaya ini diharap dapat membantu meningkatkan lagi kualiti hidup di Putrajaya dan melahirkan komuniti yang menghargai pembangunan dan akan bersama-sama memelihara kebersihan dan suasana kesejahteraan di Putrajaya.

Antara program LA 21 yang telah mula dilaksanakan adalah program Surau Komuniti Presint 9B dan Presint 14, program Laman Lestari Eco-Rangers serta Program Kitar Semula Komuniti Putrajaya.



ZAHARAH SALAMAT
Timbalan Pengarah Perhubungan Awam
b.p. Presiden Perbadanan Putrajaya

Tarikh: 20 Nov 2009

Disediakan oleh Bahagian Perhubungan Awam untuk PERBADANAN PUTRAJAYA
- Tel: 03-8887 7033 Faks: 03-8887 5013